



Inatsisartunut ilaasortaq Sofie Geisler, Inuit Ataqatigiit  
/maani

## **Inissiat pillugit § 37 naapertorlugu apeqquteqaammut 2018-328-imut akissut**

11-01-2019  
Suliaq normu.: 2018-26835  
Id normu: 37283527

Asasara Sofie Geisler

Inatsisartut suleriaasianni § 37 naapertorlugu apeqquteqaatinut nassiussannut qujanaq. Apeqqutit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

**Apeqqut 1: § 37 naapertorlugu apeqqutiga 2018-191 Naalakkersuisut allapput ulloq 20. agusti 2018 inissianik attartortut 14-it iniminni oqummik ajornartorsiutit pissutigalugit inissaminnik allamik utaqqisut. Ineqarfimminni oqummik ajornartorsiuteqarlutik attartortut qassit massakkut inissamik allamik utaqqippat?**  
INI A/S ilisimatitsivoq, januaarip aallartinnerani attartortut arfineq marluk inissiamik taartissamik utaqqisut, taakkunanngalu marluk inissiamik allamik neqeroorfigineqareersut.

**Apeqqut 2: § 37 naapertorlugu apeqqutiga 2018-191 Naalakkersuisut allapput ulloq 20. agusti 2018 inissianik attartortut 14-it iniminni oqummik ajornartorsiutit pissutigalugit inissaminnik allamik utaqqisut. Pineqartut taakku qassit 20. agusti 2018-ip kingorna nutaamik inissaminnik tunineqarpat?**  
INI A/S ilisimatitsivoq, maannarpiaq attartortoq ataasiinnaq inissiamik taartissamik utaqqisoq. Tamatumunngali attartortup pineqartup inissiamik allamik kissaateqarnera peqqutaavoq.

**Apeqqut 3: Naalakkersuisut ilisimatitsissutigisinnaavaat inissiat attartortittakkat Nuummiittut, Sisimiuniittut, Ilulissaniittut Qaqortumiittullu qanoq amerlatigisut oqummik ajornartorsiuteqarnerisut?**  
INI A/S ilisimatitsivoq: 2018-ip naanerani Nuummi, Sisimiuni, Ilulissani Qaqortumilu oqummik suliat ilisimaneqartut katillugit 171-iupput. Tassanilu inissiat attartortitat 5%-ii pineqarput. Taakkunannga 64-it najorneqarput aammalu 107-it qimanneqarsimallutik. Tassalu inissianit attartortittakkanit 5%-it oqummik nassaarfigineqarsimapput.

**Apeqqut 4: Naalakkersuisut ilisimatitsissutigisinnaavaat inissiat attartortittakkat oqummik maanna ajornartorsiuteqarfiulersimasut siusinnerusukkat aamma taamatut ajornartorsiuteqarfiusimanersut iluarsaanneqarnermilli kingorna najugaqarfigineqaqqissinnaalersimasuullutik?**  
Inissiat attartortittakkat oqummik eqqugaasimasut siornatigut oqoqarsimanersut INI A/S-imi immikkut nalunaarsorneqarneq ajorput. Taamaattumik tamatuma eqqoqqissaartumik naatsorsuiffigineqarnissaa ajornakusoorpoq. Taamatuttaaq pisuni arlalinni oquit assigiinngitsunik peqquteqartarput, soorlu inissiap naapertuutinngitsumik

atorneqarneranik imaluunniit teknikkikkut atortulersuutit (illup sannai, ruujorit silaannarissaatillu) ajoquteqarnerinik.

**Apeqquut 5: Ilaqutariit maanna najugaqarfimminni oqummik ajornartorsiuteqartut ineqarnikkut aaqqiissuteqarfiginissaat pillugu Naalakkersuisut qanoq neqerooruteqarsinnaappat / neqerooruteqalersaarpas?**

Inissianut INI A/S-ip aqutaanut tunngatillugu Naalakkersuisut ilisimatitsissutigisinnaavaat, inissiami attartortittakkami oqoqartoq paasineqarpat, INI A/S attartortumut, inissiaqarfimmut illullu piginnittuanut aaqqiissutissatut pitsaanerpaatut isigineqartoq suunersoq naliliisussaammat. Periarfissat uku akornanni immikkoortitsisoqartarpoq:

- Attartortoq inissiami najugaqartiinnarlugu ajoquserneq erngerluni iluarsineqassaaq.
- Ajoqusernerit annikinnerutillugit ajoqusernerup sanasutut piginnaanilinnit suliaqarnerisa nalaanni attartortoq najugaqaannarsinnaavoq (attartortoq oqummut qanoq iliuuseqarsinnaanersoq ilitersuullugu).
- Pisuni allani inissiap oquiarneqarnerani attartortoq inissinneqarallarnissamik neqeroorfigineqassaaq.
- Pisuni ajornerusuni attartortoq inissiamik allamik neqeroorfigineqassaaq, tak. Attartortitsisarnermut peqqussummi § 5 aamma §§ 67-70.

**Apeqquut 6: Inissiani oqummik ajornartorsiuteqarfiusuni najugallit ilaqutariit peqqissusaat – tamanna Naalakkersuisunut qanoq isumaqarpa?**

Ilaqutariit inissiani oqummik ajornartorsiuteqarfiusuni najugaqartut peqqissusaat pingaaruteqartoq Naalakkersuisut ilisimatitsisinnaapput. Tassalu Namminersorlutik Oqartussat inissiani oqummut akiuinissamat "inissianillu qungujulasunik" suliaqarnissamat aningaasaliissutissanut inatsisaanni aningaasaliisoqarsimavoq, taammattaaq tak. apeqquut 7-imut akissut.

2018-imi decembarimi maskiinat nutaat pisiarineqartut marluk atorlugit misileraalluni suliamik aallartitsisoqarpoq, taakkulu inissiat oquup naaneqaataanik piiavagineqarnerinut misilerarneqarput. Suliaq misiligutaasoq oquiaanerup naammassinissaata tungaanut illup iluata ilaqutariinnut isumannaatsuunissaa siunertaralugu suliarineqarpoq.

**Apeqquut 7: Inissiat peqqissutsimut uloriarnartorsiortitsinngitsut pillugit siunissamat isigisumik qulakkeerinninnissaq pillugu Naalakkersuisut qanoq pilersaaruteqarpat?**

Naalakkersuisut inissiani pioreersuni iluarsaanneqarnissaminnik pisariaqartitsiviusuni "inissiat qungujulasut" pillugit suliaq ingerlappaat. Suliami tassani inissiat suliarineqareernerminni peqqinnartuunissaat najugaqarfigiuminartuunissaallu siunertarineqarpoq. Tunngavissami "Inissiat qungujulasut" sumiiffiit nalinginnaasumik oquup pinngorfigisartagai aallunneqarput. Misilittakkat malillugit tamanna nalinginnaasumik inini masattuleriffinni, soorlu uffarfinni/perusuersartarfinni, igaffinni, silaannarissaatini pisullu ilaanni igalaani/matuni ussiitsuni aammalu illup sananeqaataani nillip isaaffiini aallaaveqartarpoq.

Tamatuma saniatigut Ineqarnermut Attaveqatigiinnermullu Naalakkersuisoqarfik sanaartukkanik nutaanik, isumaginninnikkut avatangiisitigullu attanneqarsinnaasunik kiisalu tamanut aningaasaqarnermik eqqarsaateqarfiusunik suliaqarpoq.

Avatangiisinut tunngatillugu ilaatigut illup sannaani atortut aasinnaanngitsut aserfallatsaalioruminartullu atorneqarnissaat annertuumik siunnerfigineqarpoq, taamaattumillu atortunik toqqaanermi illullu sananeqaataanni siunissami illup iluata silaannaata peqqinnartuunissaa eqqarsaatigineqarluni.

Sanaartornermut piunasaqaatini matuma siuliani taaneqartuni oquttoqarnissaata annikillisarneqarnissaa, kiisalu illut sivilisuumik atasinnaanissaat qulakkeerniarneqarpoq. Tamatuma peqatigisaanik siunissamut ungasissumut ingerlatsineranut aserfallatsaaliuinernullu aningaasartuutit ikilisarneqarnissaannik qulakkeerisoqassaaq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Karl Frederik Danielsen